



RAMPAS
...Nordin menunjukkan kain bengkung dan syabu yang dirampas daripada seorang warga Iran, semalam.

Dadah dalam bengkung

2.2kg syabu dililit pada tubuh warga Iran

SHAH ALAM: Misteri perut buncit seorang lelaki warga Iran berlegar-legar di kawasan tuntutan bagasi, Lapangan Terbang Antarabangsa Kuala Lumpur (KLIA) sebaik tiba melalui penerbangan Dubai, Khamis lalu membongkar penemuan sejumlah dadah jenis syabu.

Dalam kejadian kira-kira jam 10.30 pagi itu, pasukan narkotik KLIA yang membuat pemantauan biasa terhadap penumpang yang baru tiba dari luar negara curiga dengan lelaki yang memakai jaket dan berbaju putih dalam keadaan luar biasa.

Sebaik ditahan, lelaki itu dibawa ke bilik khas dan hasil pemeriksaan membawa kepada penemuan satu bungkusan dadah seberat 2.2 kilogram dibalut kain pada badan suspek.

Ketua Jabatan Siasatan Jenayah Narkotik Selangor, Asisten Komisioner Nordin Kadir, berkata sekali imbas, suspek seolah-olah memakai bengkung dengan lilitan kemas pada badannya selain memakai jaket kulit dan baju-T bagi mengelirukan pihak berkuasa.

“Bagaimanapun dengan kepakaran yang ada, kami dapat mengesan suspek terbabit dan siasatan mendapati dia dipercayai

dijadikan ‘kaldai dadah’.

“Dadah yang dirampas ini dianggarkan bernilai RM550,000 dan dia kini direman seminggu mulai dari tarikh tangkapan,” katanya pada sidang media di pejabatnya di sini, semalam.

Siasatan rekod perjalanan mendapati, suspek kali pertama memasuki negara ini dan taktik yang digunakan itu kali pertama digunakan berikutan taktik menyorok dadah dalam bagasi berjaya dikesan polis.

Sementara itu, dalam kes berasingan pada hari sama, Nordin berkata sepasukan polis dari Jabatan Siasatan Jenayah Narkotik Bukit Aman menahan seorang penjual karpet di sebuah apartmen di Taman Tun Abdul Razak, Ampang, dekat sini.

Menurutnya, hasil siasatan polis ke atas lelaki juga warga-negara Iran berusia 40 tahun itu membawa kepada penemuan lapan botol lutsinar berisi dadah seberat 170 gram.

“Kami percaya suspek berse-
lindung di sebalik perniagaan menjual karpet untuk mengedar dadah.

“Siasatan mendapati suspek berniaga karpet di ibu kota sejak lima tahun lalu dan dadah ini dipercayai dipasarkan kepada warga negara berkenaan,” katanya menambah nilai rampasan daripada peniaga karpet itu dianggarkan RM51,000.